

41. Landjugenddag

Sech engagéieren a beméien

Usprooch vum Kim Siebenaller, Presidentin vun der Lëtzebuenger Landjugend

Léif Éiregäscht,

Léif Frënn a Membere vun der Lëtzebuenger Landjugend,

Erlaabt mir fir virop drop hinzeweisen, datt dëst meng lescht Usprooch als Presidentin vun der Lëtzebuenger Landjugend ass. No dësem Landjugenddag iwwerhëllt d'Nelly Meyers dës Funktioun. De President vun eisem Daachverband, de Remy Harpes, geet dono op dëse Wiessel an.

Et ass awer fir mech eng grouss Éier, lech haut hei zu Héiweng op der 41. Editioun vum Landjugenddag ze begréissen.

Zënter 1975 lued jo bekanntlech all Joer onënnerbrach en anere Landjugendgrupp op Christi Himmelfahrt op de Landjugenddag an. Ech fannen et ëmmer erëm schéin, wéi mir et zënterhier all Joer fäerdeg bréngen, fir dee gréisste Rallye zu Lëtzebuerg op d'Been ze stellen an esouvill Jugendlecher op enger Plaz ze versammelen. Och ass de Landjugenddag e besonnescht Beispill vun der gudder Zesummenaarbecht an engem Veräin.

D'Organisatioun vun dësem Dag, wou nees honnerte jonk Leit beienee kommen, ass mat vill Aarbecht verbonnen a verlaangt vun der eenzeler regionaler Landjugendgrupp en enormen Asaz. Scho méintelaang am Viraus gëtt dësen Dag op benevoler Basis geplangt.

Et gëtt zwar ëmmer mi schwéier nei jonk Leit ze begeeschteren an ze motivéieren. Mee grad dat mécht d'Landjugend aus. Hei si Jonker, déi Responsabilitéit iwwerhuelen, sech engagéieren a sech beméien.

Léif Leit,

Och wann de Landjugenddag ee vun den Haaptevenementer vun der Lëtzebuenger Landjugend duerstellt, esou hu mir awer nach weider Aktivitéiten.

Am 2-Jores-Rhythmus organiséiere mir d'Landjugend-Power-Aktioun. Hei hunn d'Memberen aus den eenzelne Gruppen d'Aufgab, eng gemeinschaftlech Aarbecht duerchzuféieren, déi zur Verschéinerung vum



Als Merci fir hiert Engagement am Interessi vun der Lëtzebuenger Landjugend hunn de Remy Harpes, President vum Daachverband LLJ – JB& JW, an de Jeff Boonen, President vun de Lëtzebuenger Jongbaueren a Jongwënzer, dem Kim am Numm vun eisen Associatiounen e Bong fir hire jonke Stot iwwerreicht

Duerf bäidréit oder eng nätzlech Ariichtung fir d'Bewunner aus der Géigend duerstellt. Mat dëser 36-Stonnen-Aktioun wëlle mir weisen, datt mir äis och fir d'Liewensqualität am ländleche Raum asetzen. Et ass äis eben net egal, wou a wéi mir liewen.

Hei wëll ech awer och en Opruff un d'Politik maachen, wat d'Problemer betrëfft, déi eis Kollegen d'Jongbaueren scho laang a Punkto Genehmigungsverfahren kennen. Waardezäite vun 2, 3, 4 Joer fir eng Genehmigung fir e Stall, eng Hal si jo haut scho bal normal. Dës Problematik kenne mir och - et si Jonker do, déi an den Dierfer wëlle wunne bléiwen an sech do engagéieren. Och si sinn un all méiglech Ëmweltoplage gebonnen a musse Waardezäite vun e puer Joer hinhuelen, fir eng Genehmigung fir hiert Haus ze kréien oder just fir en Ëmbau kënne virzehuelen. Si sollen ënnerstëtzt ginn, fir do kënnen ze bleiwen.

Niewent der grad ernimmter Landjugend-Power-Aktioun organiséiere mir all Joer de sougenannten Dag vun der Kooperatioun, woumat mir d'Entwécklungszesummenaarbecht am Interessi van der Landbevëlkerung an Afrika vun eiser ONG ënnerstëtzen. De 4. Oktober 2015 gëtt dee vun der „Landjugend Cliärref“ am Hall Polyvalent zu Clief organiséiert. Mir wëllen net nëmmen heiheem eppes bewierken, mee och a mannerbemëttelte Länner am Süden.

Esou hunn sech am September 2014 e puer Membere vun der Landjugend op de Wee an de Kamerun gemaach, fir do ënnert anerem de Kooperatiounsprojet vun der Maternité zu Soa ze besichen. Et wor eng grouss Freed fir si, bei der Inauguratioun vun der Maternité dobäi dierfen ze sinn. Zesumme mat der Responsabel vum Centre de santé vu Soa, de Mataarbechter, de lokalen Autoritéiten an all de Beneficiairen, konnten si no enger feierlecher Zeremonie d'Maternité aweien an se de Verantwortlechen uvertrauen.

Donieft gouf et d'Geleeënheet fir sech mat de Verantwortleche vun der Maternité an och mat de Beneficiairen ze treffen. Op verschiddenen Ausflich kruten si en Abléck an d'Land mat senge Leit, der Natur an der Kultur. Wéi eisen Nationalaumônier Romain ëmmer seet, sech fir eng ONG engagéieren, heescht Frënn begéinen. An ech sinn iwuerzeegt, datt vill Frëndschafte geschloss konnte ginn.

Dëst Joer hu mer niewent de Preparatioune vun eisem traditionelle Stand vun der Foire Agricole – wou mir eis Associatioune presentéieren - an lessen a Gedrénks zerwéieren - d'Koordinatioun vun de sougenannte „Burkina Days“ iwuerholl. Sechs Associatiounen an ONGen hunn sech zesummegeschlossen, fir am Kader vum „Europäesche Joer fir Entwécklung“ op d'Kooperatiounsaarbecht am Burkina Faso anzegoen an de Visiteure vun der Foire Agricole e flotten Animatiounsprogramm unzebidden, deen de Burkina Faso mat senge Leit a senger Kultur an de Fokus setzt.

Et leien och Flyere vir, wou Dir lech e Bild kënnt maachen, wat do leeft. Mir hoffen lech dann am Zelt vun de „Burkina Days“ begréissen ze kënnen.

Niewent dësen Aktivitéiten, déi op nationalem Plang lafen, kommen och nach eng etlech Aktivitéite vun de regionale Landgruppen beieneen, wéi de Mähdreschercross, de Geschécklechkeetsconcours, den Erfinderwettbewerb, ... , ob déi ech hei aus Zäitgrënn net am Detail agoe kann.

Léif Leit,

Wann Der erlaabt, wëll ech zum Schluss vu menger Usprooch e puer Leit mäi Merci ausdrécken:

Der Landjugend Süden, dem Claude a senger Ekip e grouse Merci fir d'Organisatioun vun dësem Dag. Merci fir Äert Engagement am Intressi vun der Landjugend.

Och dem Här Georges Fohl, Buergermeeschter vun der Gemeng Garnech an de Gemengeresponsablen ee grouse Merci, datt Dir lech fir d'Duerchféierung vum Landjugenddag hei an der Gemeng ausgesprach hutt.

E besonnesche Merci geet un eise Romain, den Nationalaumônier vun der Lëtzebuerger Landjugend – Jongbaueren a Jongwënzer. Hie steet äis ëmmer mat Rot an Dot zur Säit. Op kee Fall wëll ech d'Chantal Heuschling an de Franz Glodt aus eisem Sekretariat vergiessen. Merci fir hir Aarbecht, déi si mat vill Éiergäiz an Engagement uginn.

De Ministère an Organisatiounen, déi äis all Joer nees finanziell ënnerstëtzen, wëll ech vun hei aus och mä grouse Merci ausdrécken.

Mir bleibt elo nach ee Merci, an dee geet un lech all. Et ass fir mech eng grouss Freed, datt Dir de Wee op en Neits bei d'Landjugend fonnt hutt.

Zum Schluss wënschen ech menger Nofolgerin, dem Nelly Meyers, nach vill Gléck, du méchs dat ☺!



D'Kim Siebenaller (2.v.l.) wënscht hirer Nofolgerin, dem Nelly Meyers (4.v.l.) eng glécklech Hand an der Funktioun vun der neier Nationalpresidentin vun der Lëtzebuerger Landjugend

Am Numm vun der Landjugend wënschen ech lech deemno e schéinen Dag an hoffen dat mir lech dat nächst Joer dann op Christi Himmelfahrt, um 42. Landjugenddag, dee vun der Landjugend Zenter zu Biekerech organiséiert gëtt, erëmgesinn.

D'Wuert geet elo an de Remy Harpes, de President vun eiser Daachorganisatioun, deen och e puer Wuert un äis riichte wëllt.